



臣英和臣黃鉞前奉

諭旨以春秋左傳一書義疏繁重杜林注坊行本離析
章句均不便於初學

命臣等率同編修臣程恩澤臣祁雋藻重加纂輯務令
簡明賅洽一覽曉然臣等恪承

指示敬謹編摩傳各爲篇首尾完具注附其後以便讀
者音訓句讀闕有異同酌歸一是其寫本均經編
修臣許乃普臣田嵩年悉心校勘由

武英殿刊刻進呈

御覽伏候

欽定謹

奏道光三年九月十五日奉

旨知道了欽此

欽定春秋左傳讀本凡例

一春秋經旨闕深左氏傳原始要終使讀者
自得其意也昭二年傳云韓起見魯春秋
曰吾乃今知周公之德是魯春秋本周之
舊典著于策書孔子承述之傳惟疏證其
事聖人微旨具在其中哀十四年句繹以
下賈逵云此下弟子所記明弟子未得策
書左傳亦不爲續經解說今正經以左氏
爲傳故不復爲經作注惟解釋傳義以爲

讀本

一古人經傳各自爲書惟左氏春秋經傳自古相附十八卷襄二十六年經前之傳杜預注云當繼前年之末而特跳此者傳寫失之是杜預以前之本襄公二十六年別爲卷首又傳在經前也其序言分經傳相附隨而解之蓋自以注附之其分經傳正文相附必不始于預也據襄二十六年所注知卷目已古今依用之爲讀本三十卷

一經文公羊穀梁二本異者多屬方言左氏則策書正文故不旁引至杜預以傳推得經中闕文則爲采取附入傳注中以備經義

一傳文轉寫增損改易者僖十五年傳自曰上天至裁之四十二字唐定本無之而唐俗本沿而不革今岳本亦有之非也襄二十七年傳與宋致死四字注疏本有而岳本無之岳本是也今用岳本爲之旁引入

音釋中此皆是非易明故不爲繁論但存異文俾小學知古文有異同當致慎且以知古來學術盛衰卽文字多少之數可以見其時儒風所嚮襄二十八年岳本有亂十人昭二十四年十人上乃增臣字則是岳本慎于前而疏于後也宣十二年傳楚人憇之說文引黃顛本正作畀之成十八年傳正月辛巳服虔本作辛未此則晉本已誤亦引入音釋中庶爲愛素好古者導

夫先路焉

一史書千支文易錯誤杜預推二百四十餘年朔望閏月用意最密經傳誤字均可指正後人譏杜氏改經就傳不得爲左氏功臣其言非也凡杜氏所推誤字有關事迹者均爲錄出襄九年傳閏月戊寅定以閏月爲門五日屬上句戊寅爲濟師日屬下句詳音釋中古人均以實事求是非改經傳也

一字音今古不同自有四聲後而音讀紛然矣此本音讀皆以經典釋文爲本間有反切不合今讀者則以音韻闡微正之

一左傳之說以劉歆賈逵許慎爲古漢時鄭眾許淑服虔董遇穎容晉時杜預皆能名家自杜注單行舊說猶可搜輯國語史記異同亦足以引證杜說獨精者則標預名顯與儒先異同或從或否亦標其名其尋常解詁則平敘之芟其繁說增附舊聞傳

引易書詩禮自是周人師說與漢以後傳義不能強合今惟就其文申引之大歸平易近人爲宗不敢迂苛亦不詭隨俗議要于經傳可通人事有益注解異于經論故不辨公穀異義其何休膏肓則指攻左傳今用鄭氏箴義通于注中不盡標何鄭名目以弭爭訟史通亦膏肓之流今傳文旣通則不必更爲芻辨王肅有心立異不復廣加采錄劉炫孔穎達陸德明則錄其所

長至于趙匡啖助勃谿織佻多不足辨其
後帖括經義比次成書均不復引駁以省
簡牘

一史學以地里爲重可以見賢愚成敗得失
之迹杜預初據晉泰始官司空圖及江表
平荆揚徐三州改用新貢圖籍以求審也
其一地二名二地一名辨之最詳近人高
士奇顧棟高江永各有成書而越國鄙遠
之說見于左傳正文後儒多忽之魯地在

今許州鄭地在今泰安晉地在今范縣皆
鄙遠之證惟晉大國秦不能越之故鄭以
爲難明他國則不然也凡此之類皆實以
今地隨條疏之其有古今異名若豫章則
左傳漢書南北各別此亦杜說精審非後
人所及特發例子此以杜羣惑至于師行
曲折容有別道出奇而傳記大略其軌躅
所循難以尺寸指實昭五年楚伐吳之役
羅汭萊山東西迂折則地志之說難以取

證杜預不言所在蓋大略可知不宜隨取一地實之反致窒塞也

一天文五行占家不同而左氏自有占法今就其義敷暢之不復更引他家至日食可以檢朔其說始於東漢春秋時尙不知日食可由算得也二百四十餘年所載僅三十六則其時必有疏失左氏又多無傳至襄二十一年九月十月二十四年七月八月皆比月日食相距僅二十九日有奇于

日行食限不合而漢時高祖三年文帝前三年皆有之定由其時史官證記後人不可以臆更正此當因而存之以見舊式其他有占驗者隨條說之使大旨可通亦以見其時人事得失因以垂戒

欽定春秋左傳讀本目錄

卷一

隱公
元年至十一年

卷二

桓公
元年至十八年

卷三

莊公
元年至十二年

卷四

閔公
元年至二年

卷五

僖公

元年至十五年

卷六

僖公

十六年至二十六年

卷七

僖公

二十七年至三十三年

卷八

文公

元年至十年

卷九

文公

十一年至十八年

卷十

宣公

元年至十一年

卷十一

宣公

十二年至十八年

卷十二

成公

元年至十年

卷十三

成公

十一年至十八年

卷十四

襄公元年至九年

卷十五

襄公十年至十五年

卷十六

襄公十六年至二十二年

卷十七

襄公二十三年至二十五年

卷十八

襄公二十六年至二十八年

卷十九

襄公二十九年至三十一年

卷二十

昭公元年至三年

卷二十一

昭公四年至七年

卷二十二

昭公八年至十二年

卷二十三

昭公
十三年至十七年

卷二十四

昭公
十八年至二十二年

卷二十五

昭公
二十三年至二十六年

卷二十六

昭公
二十七年至三十二年

卷二十七

定公
元至七年

卷二十八

定公
八年至十五年

卷二十九

哀公
元至十三年

卷三十

哀公
十四年至二十七年

欽定春秋左傳讀本卷一

隱元年盡十一年

隱公

名息姑。惠公之子。母聲。子諡法不尸其位曰隱。



傳惠公元妃孟子。孟子卒，繼室以聲子。生隱公。宋武公生仲子。仲子生而有文在其手，曰為魯夫人。故仲子歸于我，生桓公，而惠公薨，是以隱公立而奉之。

魯周公國。今曲阜。惠公孝公子。宋今商邱。子宋姓孟。長也。聲諡也。諸侯娶元妃。其媵姪。弟八人。元妃卒，則長姪弟繼室。仲子手文曰為魯夫人。魯古作祚。文或似之。隱公立桓為惠公太子而已。攝位以奉之。傳於元年前預發此語。是謂先經以始事也。

古文為作曰。魯作為。夫作。一。說曰。印為也。傳交手字下。本作為。印日。夫。人。無。以。宗。

同治八年謹遵

三專賣本卷一 隱公

經元年春王正月 三月公及邾儀父音甫盟

于蔑 夏五月鄭伯克段于鄆音煙 秋七月

天王使宰咺音烜來歸惠公仲子之貺音切 芳鳳

九月及宋人盟于宿 冬十有二月祭音蔡伯

來 公子益師卒

傳元年春王周正月不書即位攝也

經言王正月傳言王周正月者子周王正

丑殷王正寅夏王正傳謂此王正周之王

三月公及邾儀父盟于蔑邾子克也未王命

故不書爵曰儀父貴之也公攝位而欲求好

去聲於邾故為蔑之盟

邾附庸國今鄒縣蔑在今泗水爵稱子君名克字儀父

夏四月費音秘伯帥師城郎不書非公命也

費郎二邑皆在今魚臺與季氏費別非君命故舊史冊不載左氏多旁采簡牘之文

自附於傳

初鄭武公娶于申曰武姜生莊公及其音恭

叔段莊公寤生驚姜氏故名曰寤生遂惡去聲

之愛共叔段欲立之亟音器請於武公公弗許

同治八年謹遵

及莊公即位為去聲之請制公曰制巖邑也虢
 叔死焉他邑唯命請京使居之謂之京城犬
去聲叔祭音蔡仲曰都城過百雉國之害也先王
 之制大都不過參音三國之一中五之一小九
 之一今京不度非制也君將不堪公曰姜氏
 欲之焉音煙辟音避害對曰姜氏何厭音淹之有不
 如早為之所無使滋蔓蔓難圖也蔓草猶不
 可除況君之寵弟乎公曰多行不義必自斃
 子姑待之既而大叔命西鄙北鄙貳於己公

子呂曰國不堪貳君將若之何欲與大叔臣
 請事之若弗與則請除之無生民心公曰無
 庸將自及大叔又收貳以為己邑至于廩延
 子封曰可矣厚將得眾公曰不義不暱厚將
 崩大叔完聚繕甲兵具卒乘去聲將襲鄭夫人
 將啟之公聞其期曰可矣命子封帥車二百
 乘以伐京京叛大叔段段入于鄆音煙公伐諸
 鄆五月辛丑大叔出奔共書曰鄭伯克段于
 鄆段不弟音悌故不言弟如字如二君故曰克稱

鄭伯譏失教也。謂之鄭志不言出奔難之也。遂寘姜氏于城潁而誓之曰：不及黃泉無相見也。既而悔之。潁考叔為潁谷封人，聞之，有獻於公。公賜之食，食舍上聲肉。公問之，對曰：小人皆有母，皆嘗小人之食矣。未嘗君之羹，請以遺之。公曰：爾有母遺，繫伊音我獨無。潁考叔曰：敢問何謂也。公語去聲之故，且告之悔。對曰：君何患焉？若闕地及泉，隧而相見，其誰曰不然？公從之。公入而賦，大隧之中，其樂也。融融

姜出而賦，大隧之外，其樂也。泄泄音異遂為母子如初。君子曰：潁考叔，純孝也。愛其母，施音異及莊公。詩曰：孝子不匱，永錫爾類。其是之謂乎。

鄭都今新鄭申在今南陽姜姓國制即虎牢在今汜水西本東虢虢叔地鄭滅虢叔取之京城在今滎陽縣東南廩延今延津地鄆今鄆陵縣地共今輝縣城潁在今臨潁縣寘生者史云生之難一日寐而生之寘而始知其生故驚大都當國城三分之一中都五分之一小都九分之一今都城過百雉雉飛橫三丈叔段之城過三百丈而鄭伯爵城方五里當九百丈京過三分之一故曰不度命西鄙北鄙貳於己謂

使邊鄙公邑亦屬於己若兩有所屬者然以爲己邑則取之不屬公矣不義不暱者不義於君不暱於兄祭仲公子呂皆鄭大夫子封即公子呂書曰克者段據大都勢如二君斥言鄭伯克之不稱國討者譏鄭伯不制之於早是志在殺之故難言其出奔穎考叔鄭之典封疆者食舍肉君賜小臣食無體薦有肉羹考叔不啜羹欲以發問公曰緊者語助聲考叔教公闕地及泉而爲隧道融融和樂泄泄舒散是考叔之孝所錫及引詩錫類言孝能感通其類凡傳引君子曰其時評論得失之言

秋七月天王使宰咺音來歸惠公仲子之賵

切芳鳳緩且子氏未薨故名天子七月而葬同

軌畢至諸侯五月同盟至大夫三月同位至

士踰月外姻至贈死不及尸弔生不及哀豫凶事非禮也

宰官咺名贈助葬之物緩贈惠公生贈仲子皆非也天子七月則同軌之國皆能至諸侯五月大夫三月士踰月皆量致弔者遠近爲差大夫三月蓋以三十日爲一月士踰月蓋度一月亦首尾兼三月故禮言士三月葬與此通也不及尸謂已葬不及哀謂不及弔唁之期仲子未薨不可豫贈

八月紀人伐夷夷不告故不書有蜚音不爲

災亦不書

紀今壽光地夷國今卽墨地蜚負盤也郭璞云臭蟲本草云蜚厲蟲

惠公之季年敗必邁切宋師于黃公立而求成焉九月及宋人盟于宿始通也

敗敗之也黃今考城地宿在今東平州

冬十月庚申改葬惠公公弗臨故不書惠公之薨也有宋師犬子少葬故有闕是以改葬衛侯來會葬不見公亦不書

惠公薨時宋師蓋報黃之役故求成而後改葬公不臨衛侯不見公以公讓不為喪主

鄭共叔之亂公孫滑出奔衛衛人為去聲之伐

鄭取廩延鄭人以王師虢師伐衛南鄙請師於邾邾子使私於公子豫豫請往公弗許遂行及邾人鄭人盟于翼不書非公命也

虢為西虢今陝州與鄭制東虢別翼今鄒縣地公孫滑叔段子

新作南門不書亦非公命也

十二月祭音蔡伯來非王命也

祭周畿內國伯爵來非王命見公故書

眾音終父音甫卒公不與去聲小斂故不書日

眾父公子益師字君錄其喪故卒之當小斂時君不視故不詳其日

同治八年謹遵

三專賣本卷一

隱公

六

經二年春公會戎于潛 夏五月莒人入向

無駭戶楷切帥師入極 秋八月庚辰公及

戎盟于唐 九月紀裂繻音須來逆女 冬十

月伯姬歸于紀無傳履綸紀卿也卿為君逆

公自主婚也卿為君逆至其國而君逆於所

館所謂大婚既至冕而親迎是也禮之節也

伯姬者先公之長女也內女為諸侯夫人書

歸者五而紀伯姬獨書逆以後遭紀之變而

閔之且其姊叔姬之賢不可不錄故叔姬之

歸不得略而於伯姬之歸特書逆以明其為

也嫡 紀子帛莒子盟于密 十有二月乙卯

夫人子氏薨無傳公夫人也書薨明齊也夫

人與君其尊同也先薨不葬明

順也夫人之義從君者也後有合葬之事也

不地者婦人無外事有常處也尊同則位正

順昭則 鄭人伐衛

傳二年春公會戎于潛脩惠公之好去聲也戎

請盟公辭

戎人居中土者其會禮蓋順其俗為之公辭盟至秋始為唐之盟潛魯地

莒子娶于向向姜不安莒而歸夏莒人入向

以姜氏還

莒今莒州紀姓國亦曰己氏向在今莒州南七十里姜姓國傳言失婚姻之義

司空無駭入極費庠音琴父音甫勝之

同治八年謹遵

三傳讀本卷一 隱公

極在今魚臺西附庸國魯三卿司徒司馬司空無駭未賜族片父城郎之費伯也費郎皆今魚臺傳言入極乃片父之功

戎請盟秋盟于唐復脩戎好也去聲

唐一名棠在今魚臺東北傳止言秋經言八月庚辰杜預云八月無庚辰庚辰七月九日也經傳干支多轉寫致誤

九月紀裂繻來逆女卿為君逆也去聲

十月伯姬歸于紀其待年之勝日記叔姬以七年三月歸于紀俱見經

冬紀子帛莒子盟于密魯故也

密今昌邑縣地子帛裂繻字也莒魯有怨紀魯姻盟莒和解之故比之內大夫書莒

子

鄭人伐衛討公孫滑之亂也

治元年取廩延之亂

經三年春王二月己巳日有食之無傳己巳二月朔也

不書朔史失之也日月共行於天而各有道歲凡十二會會而東西同度南北同道則月揜日而食不言月揜日止書日有食之者抑陰而存陽也日食必書教人君以恐懼修省之道也克謹天戒則雖有象而無其應弗克畏天災咎之來必矣 三月庚

戊天王崩 夏四月辛卯君氏卒 秋武氏

子來求賻音附 八月庚辰宋公和卒 冬十

有二月齊侯鄭伯盟于石門 癸未葬宋穆

公無傳卒從外錄來告也葬從內錄往會也故不曰宋葬穆公而曰葬宋穆公也會者

非卿則不書書其所為之事其有使往可知也

傳三年春王三月壬戌平王崩赴以庚戌故

書之

赴先十二日欲諸侯速至經書其偽以懲其過

夏君氏卒聲子也不赴于諸侯不反哭于寢

不耐于姑故不曰薨不稱夫人故不言葬不

書姓為去聲公故曰君氏

赴則受弔反哭虞祭始成葬禮耐于姑始成祭禮公不敢正君禮故不敢備禮于其母

杜注卿士王卿之執政者

鄭武公莊公為平王卿士王貳于虢鄭伯怨

王王曰無之故周鄭交質去聲王子狐為質于

鄭鄭公子忽為質于周王崩周人將舁虢公

政四月鄭祭音蔡足帥師取溫之麥秋又取成

周之禾周鄭交惡去聲君子曰信不由中質無

益也明恕而行要平聲之以禮雖無有質誰能

閑音諫之苟有明信澗谿沼沚之毛蘋蘩蕒

同治八年謹遵 三傳讀本卷一 隱公

藻之菜，筐筥錡音釜之器。潢汙行潦之水，可薦於鬼神，可羞通於王公。而況君子結二國之信，行之以禮，又焉音用質？風有采蘩采蘋，雅有行葦，泂酌昭忠信也。

溫，今懷慶溫縣。成周，今洛陽。鄭世為王卿士，平王欲兼任西虢公。鄭伯怨王，王釋鄭之怨，故交為質。王崩，周將成，平王本意，鄭遂取周麥禾。周四月建卯，麥未熟，秋當今之夏，禾亦未熟，蓋芟踐之。山夾水曰澗，水注川曰谿，沼池也。泚，小渚也。毛謂草，蘋大萍，季春始生，可糝蒸為茹。蘩，蒿，秋可食。蘊藻，聚藻生水底，莖如釵股，葉如蓬竹。器方曰筐，圓曰筥。釜，有足曰錡，無足曰釜。潢，汙水。行潦，流潦。采蘩采蘋，義取薄物。行

葦取忠厚，泂酌取挹行潦，此傳鄭不尊王，其罪易見。君子之言，但汎論專尚盟質，無益。

武氏子來求賻，王未葬也。

武氏子，王卿之嗣。魯不供喪，致來求賻，交失之。十二月葬宋穆公。魯會葬，故書魯亦不會王葬，非禮。

宋穆公疾，召大司馬孔父音甫而屬音燭殤公焉。曰：先君舍上聲與夷而立寡人，寡人弗敢忘。若以大夫之靈，得保首領以沒，先君若問與夷，其將何辭以對？請子奉之，以主社稷。寡人雖

死亦無悔焉對曰羣臣願奉馮音也也公曰不

可先君以寡人為賢使主社稷若弃德不讓

是廢先君之舉也豈曰能賢光昭先君之令

德可不務乎吾子其無廢先君之功使公子

馮出居於鄭八月庚辰宋穆公卒殤公即位

君子曰宋宣公可謂知人矣立穆公其子饗

之命以義夫音扶商頌曰殷受命咸宜百祿是

荷平上音二其是之謂乎

宋穆公宋公和宣公弟也殤公與夷宣公之子也馮穆公之子莊公宋宣公舍子立弟

弟亦命出於義子能荷其祿此是殷禮宋殷後故稱商頌

冬齊鄭盟于石門尋盧之盟也庚戌鄭伯之

車僨弗問切于濟

石門盧皆今長清地石門濟水之門盧盟在春秋前僨仆也

衛莊公娶于齊東宮得臣之妹曰莊姜美而

無子衛人所為去聲賦碩人也又娶于陳曰厲

嬀九危切生孝伯早死其娣戴嬀生桓公莊姜

以為己子公子州吁嬀人之子也有寵而好

去聲兵公弗禁莊姜惡去聲之石碣七畧切諫曰臣

說文眈恨視也恨視者
含怒不發之意

聞愛子教之以義方弗納於邪驕奢淫泆音逸
 所自邪也四者之來寵祿過也將立州吁乃
 定之矣若猶未也階之為禍夫寵而不驕驕
 而能降降而不憾憾而能眈音珍者鮮音上聲矣且
 夫賤妨貴少陵長上聲遠閒音諫親新聞舊小加
 大淫破義所謂六逆也君義臣行父慈子孝
 兄愛弟敬所謂六順也去上聲順效逆所以速
 禍也君人者將禍是務去而速之無乃不可
 乎弗聽其子厚與州吁游禁之不可桓公立

乃老

齊今臨淄姜姓國陳今陳州媯姓國莊姜
 言東宮妹者謂與犬子同母齊元妃女也
 無子者不見荅又娶於陳者諸侯備三宮
 夫人世婦也莊姜仍自為衛元妃石碣衛
 大夫言驕奢淫泆人所由邪欲立州吁乃
 宜以義方定之不可使階緣為禍循之致
 憾則不能自安自
 重眈者安也重也

經四年春王二月莒人伐杞取牟婁無傳牟

也伐者問罪之辭服則止耳從而取其邑是
 利之也故書伐以罪其竊王之權書取以惡
 其奪人之有隱公之篇書外取邑者二陳傳
 良曰春秋之初猶以取邑為重是也後則不
 勝書矣
 戊申衛州吁弑其君完 夏公及宋

公遇于清。宋公陳侯蔡人衛人伐鄭。秋。

翬音揮帥師會宋公陳侯蔡人衛人伐鄭。九

月衛人殺州吁于濮。音卜冬十有二月衛人

立晉。

傳四年春衛州吁弒桓公而立公與宋公為

會將尋宿之盟未及期衛人來告亂。

夏公及宋公遇于清。

清衛邑在今東阿與齊邑在長清者別宿盟在元年遇者簡于會禮蓋憂鄰國之亂

宋殤公之即位也公子馮出奔鄭鄭人欲納

之及衛州吁立將脩先君之怨於鄭而求寵

於諸侯以和其民使告於宋曰君若伐鄭以

除君害君為主敝邑以賦與陳蔡從則衛國

之願也宋人許之於是陳蔡方睦於衛故宋

公陳侯蔡人衛人伐鄭圍其東門五日而還

公問於眾仲曰衛州吁其成乎對曰臣聞以

德和民不聞以亂以亂猶治絲而棼之也夫

州吁阻兵而安忍阻兵無眾安忍無親眾叛

親離難以濟矣夫兵猶火也弗戢將自焚也

夫州吁弒其君而虐用其民於是乎不務令德而欲以亂成必不免矣

宋陳蔡衛同伐鄭宋畏鄭納馮衛則以助公孫滑亂二年鄭來伐因怨鄭陳蔡助衛蔡今上蔡新蔡也時列國篡立者諸侯與之會則無復討之者故州吁求此寵以脅和其民眾仲魯大夫言恃兵則民殘民殘則眾叛安忍則刑過刑過則親離

秋諸侯復伐鄭宋公使來乞師公辭之羽父

音甫請以師會之公弗許固請而行故書曰翬

帥師疾之也諸侯之師敗鄭徒兵取其禾而還

翬字羽父鄭不車戰故曰徒兵時在九月殺州吁前則七八月事當今五六月亦芟踐其禾爾

州吁未能和其民厚問定君於石子石子曰王覲為可曰何以得覲曰陳桓公方有寵於王陳衛方睦若朝陳使請必可得也厚從州吁如陳石碯使告于陳曰衛國褊小老夫耄矣無能為也此二人者實弒寡君敢即圖之陳人執之而請蒞于衛九月衛人使右宰醜蒞殺州吁于濮石碯使其宰獯音藉羊肩蒞殺

石厚于陳君子曰石碯純臣也惡去聲州吁而

厚與音豫焉大義滅親其是之謂乎

諸侯之寵未能定位故言王觀為可謂王許其觀則免討而民志和定厚懼王討故曰何以得觀碯教之如陳使請王也陳侯曰桓公傳以後得謚號追書之洎臨也濮陳地水名在今陳州城北大義當斷明小義則可兼子愛之

衛人逆公子晉于邢冬十二月宣公即位書

曰衛人立晉眾也

邢國今邢臺衛人逆之不言入善其得眾

經五年春公矢魚于棠夏四月葬衛桓公

秋衛師入邾音成九月考仲子之宮初獻

六羽邾人鄭人伐宋螾音冥無傳蟲食苗心曰螾國以

民為本民以食為天書之使人君畏天災重民命戒逸欲啟憂勤也齊履謙曰春秋所書有災有異害及於民之謂災物反其常之謂異二者魯皆備書諸國惟異則書蓋災則事止一國異則理關天下也冬十有二月辛巳公子彊苦侯

卒宋人伐鄭圍長葛

傳五年春公將如棠觀魚者臧僖伯諫曰凡

物不足以講大事其材不足以備器用則君不舉焉君將納民於軌物者也故講事以度

軌量謂之軌取材以章物采謂之物不軌不

物謂之亂政亂政亟行所以敗也故春蒐

夏苗秋獮音蘇冬狩皆於農隙以講事也三年

而治兵入而振旅歸而飲至以數上聲軍實昭

文章明貴賤辨等列順少長習威儀也鳥獸

之肉不登於俎皮革齒牙骨角毛羽不登於

器則公不射古之制也若夫山林川澤之實

器用之資阜隸之事官司之守非君所及也

公曰吾將略地焉遂往陳魚而觀之僖伯稱

疾不從書曰公矢魚于棠非禮也且言遠地

也

棠今魚臺城東北十二里有魯侯觀魚臺地居曲阜西南為宋魯界上公欲大設捕

魚之備觀之臧僖伯諫言漁獵之備獵以講祀戎大事皮革齒牙骨角毛羽備器用

所以度軌備物故春田蒐擇不孕者夏田為苗除害秋田順秋氣獮殺冬田圍狩皆

於農功四時之隙三年則大治兵入有振整眾旅之禮歸飲於廟日飲至以數車徒

器械以昭車服旌旗以明貴賤之秩以辨等列之次以順少長之序以習威儀之則

若漁及漁器則有司存非君所及也公遜辭畧地畧巡行也言巡行邊境諱遠地也

曲沃莊伯以鄭人邢人伐翼王使尹氏武氏

助之翼侯奔隨

翼初封唐後曰晉姬姓國曲沃今聞喜地亦曰新城晉別封成師之邑翼今翼城縣晉故絳也時晉都之隨今介休縣地與隨國別尹氏武氏周大夫族莊伯成師子也

夏葬衛桓公衛亂是以緩

四月鄭人侵衛牧以報東門之役衛人以燕師伐鄭鄭祭足原繁洩駕以三軍軍其前使曼音萬伯與子元潛軍軍其後燕人畏鄭三軍而不虞制人六月鄭二公子以制人敗燕師于北制君子曰不備不虞不可以師

牧衛邑今汲縣地燕今胙城縣地此南燕姑姓國春秋所謂燕皆南燕其姬姓國別名之曰北燕制今汜水二公子曼伯子元也虞慮也

曲沃叛王秋王命虢公伐曲沃而立哀侯于翼

翼侯已奔隨故立其子光

衛之亂也邾人侵衛故衛師入邾

邾國今汶上縣

九月考仲子之宮將萬焉公問羽數於眾仲對曰天子用八諸侯用六大夫四士二夫舞

所以節八音而行八風故自八以下公從之

於是初獻六羽始用六佾音也

魯自惠公請天子禮樂於周蓋已借用八佾至是仲子之廟始用六佾非初獻六羽或魯本無妾母之廟至是始物之疑問羽數而用六佾

舞皆以八人為列六佾六行六八四八八也四佾四行四八三三六也二佾二行二八六八也

考成也仲子桓母以非元妃故別立廟萬干舞也亦為舞總名文舞用籥故問羽數八六四二皆方列自乘之八為六十四人六為三十六人四為十六人二為四人也八音金石絲竹匏土革木之器以舞合其音節八風者東谷風東南清明風南凱風西南涼風西閭闔風西北不周風北廣莫風東北融風人舞動行之八音八風竹合廣莫土合融革合谷匏合清明絲合凱石合涼金合閭闔木合不周皆以舞節行之

宋人取邾田邾人告於鄭曰請君釋憾於宋敝邑為道音導鄭人以王師會之伐宋入其郛

以報東門之役宋人使來告命公聞其入郛

也將救之問於使去聲者曰師何及對曰未及

國公怒乃止辭使者曰君命寡人同恤社稷

之難去聲今問諸使者曰師未及國非寡人之

所敢知也

郭郭也東門役在四年公知而問故使者忿而改命皆失之七年公仍為伐邾之師

冬十二月辛巳臧僖伯卒公曰叔父有憾於

寡人寡人弗敢忘葬之加一等

僖伯公子彊有憾謂諫觀魚不聽加一等謂命服之等

宋人伐鄭圍長葛以報入郟之役也

長葛今縣屬許州

經六年春鄭人來渝音俞平夏五月辛酉公

會齊侯盟于艾五蓋切秋七月冬宋人取

長葛

傳六年春鄭人來渝音俞平更平聲成也

渝更也平成也言改約棄前惡公為公子時為鄭所執怨鄭鄭宋結怨宋求魯助公怒宋使者失辭不救因厚鄭故鄭來

翼九宗五正頃音甫之子嘉父逆晉侯

于隨納諸鄂晉人謂之鄂侯

唐叔始封受懷姓九宗職官五正九宗一姓為九族五正五官之長嘉父翼大夫翼以王命立哀侯今更納哀侯之父於鄂鄂晉地

夏盟于艾始平于齊也

艾在今萊蕪齊魯前不平今始平

五月庚申鄭伯侵陳大獲往歲鄭伯請成于

陳陳侯不許五父音甫諫曰親仁善鄰國之寶

也君其許鄭陳侯曰宋衛實難去聲鄭何能為

遂不許君子曰善不可失惡不可長上聲其

陳桓公之謂乎長惡不悛

七全切

從自及也雖

欲救之其將能乎商書曰惡之易

音異

也如火

之燎于原不可鄉

音向

邇其猶可撲滅周任

音壬

有言曰為國家者見惡如農夫之務去草焉

芟夷蕪崇之絕其本根勿使能殖則善者信

音伸矣

五父陳公子佗也陳侯謂鄭非大國不足畏難君子言惡不可長如火燎原則不可

撲滅惡之當去如去草芟刈夷殺蕪積崇聚之根絕不復能殖則善禾得伸喻陳當

自抑制也周任周大夫

秋宋人取長葛

經書於冬冬始來告經書秋七月無事必書者舉四時以成年若秋八月九月有事

則其時已見若通一時三月內皆無事則書其時孟月此春秋法也若不見其時則

屬闕文其隱公元年春三月有蔑盟仍書王正月者見公不行即位禮定元年春王

三月有事不書正月者以定公六月即位此是記載法則左氏傳經義亦不於此言

褒貶子奪

冬京師來告饑公為去聲之請糴於宋衛齊鄭

禮也

國內共命不足禮得旁請鄰國

鄭伯如周始朝桓王也王不禮焉周桓公言於王曰我周之東遷晉鄭焉依善鄭以勸來

者猶懼不其器既切況不禮焉鄭不來矣

周采邑本在今鳳翔時地入秦子孫仍其名稱桓公名黑肩平王東徙晉文侯鄭武公左右王室故曰晉鄭焉依既至也

經七年春王三月叔姬歸于紀

無傳叔姬伯姬姊也不借

歸待年也姊不書此何以書賢之也後紀而歸於鄗以全婦道也將有其終故錄其始

滕侯卒夏城中丘齊侯使其弟年來

聘秋公伐邾冬天王使凡伯來聘戎伐

凡伯于楚丘以歸

傳七年春滕侯卒不書名未同盟也凡諸侯

同盟於是稱名故薨則赴以名告終稱嗣也

以繼好去聲息民謂之禮經

盟以名告神故薨以名告同盟

夏城中丘書不時也

中邱今蘭山地

齊侯使夷仲年來聘結艾之盟也

秋宋及鄭平七月庚申盟于宿公伐邾為去聲

宋討也

鄭既淪平。今與宋平。公失鄭援而懼宋。故為討邾。

初戎朝于周。發幣于公。卿凡伯弗賓。冬王使

凡伯來聘。還我伐之于楚丘以歸。

凡。今輝縣地。楚邱。戎邑。在曹縣東南五十里。與滑縣東之楚邱有別。凡伯失禮于戎。戎惡之。後聘魯。經戎地。故戎伐之。不言凡伯敗者。單使無眾也。戎州。今曹縣地。

陳及鄭平。十二月。陳五父如鄭。涖盟。壬申。及

鄭伯盟。歆如忌。去聲。洩伯曰。五父必不免。不賴

盟矣。鄭良佐如陳。涖盟。辛巳。及陳侯盟。亦知

陳之將亂也。

涖。盟。使人臨之。歆。歆血。忌者。志不在也。洩伯。即洩駕。不賴。盟則無所賴恃。良佐。鄭大夫。知陳將亂。以其國政治威儀知之。

鄭公子忽在王所。故陳侯請妻之。去聲。鄭伯許

之。乃成昏。

陳以忽為王寵故。

經八年春。宋公衛侯遇于垂。三月。鄭伯使

宛來歸祊。必切。彭。庚寅。我入祊。夏六月己亥。

蔡侯考父卒。音甫。無傳。辛亥。宿男卒。無傳。不名。史失之。魯

同治八年謹遵

三專賣本卷一 隱公

三

宋嘗盟于宿不葬非禮也

秋七月庚午宋公齊侯衛侯

盟于瓦屋

八月葬蔡宣公

無傳蔡宿同赴而不同葬卑宿

也天王之賻不歸雖尊弱也齊晉之役皆從雖卑強也吳楚之喪親送雖疎大也滕宿之卒不葬雖親小也可以觀世變焉故春秋不徒志葬也

九月辛卯公

及莒人盟于浮來

螟

無傳頻災頻書者臣當頻言之君當頻知之

之也君惡聞災則臣以災為諱諱言災諂也惡聞災慢也民何賴焉民為邦本本傷國從

矣冬十有二月無駭卒

傳八年春齊侯將平宋衛有會期宋公以幣

請於衛請先相見衛侯許之故遇于大丘

平宋衛者平宋衛之憾於鄭大邱衛地即垂也一地兩名今曹縣地

鄭伯請釋泰山之祀而祀周公以泰山之祊

必彭易入許田三月鄭伯使宛來歸祊不祀

泰山也

祊在今費縣西近魯舊為鄭助祭泰山湯沐邑許田在今許州城西北近鄭舊為魯朝成周湯沐邑許田有周公別廟鄭欲祊與許田交易而遜辭請祀周公宛鄭大夫入祊未受至桓元年乃卒易之

夏虢公忌父

音甫

始作卿士于周

四月甲辰鄭公子忽如陳逆婦媯辛亥以媯

氏歸甲寅入于鄭陳鍼其廉切子送女先配而

後祖鍼子曰是不為夫婦誣其祖矣非禮也

何以能育

鍼子陳大夫禮逆婦必先告祖廟而後行故楚公子圍稱告莊共之廟鄭忽先逆婦而後告廟故曰先配而後祖此杜預說也若賈逵則以配為成夫婦也禮齊而未配三月廟見然後配鄭眾以配為同牢食也先食而後祭祖無敬神之心故曰誣其祖鄭康成以祖為軼道之祭也先為配匹而後祖道言未去而行配

齊人卒平宋衛于鄭秋會于溫盟于瓦屋以釋東門之役禮也

溫瓦屋杜氏云皆周地今考瓦屋里在涓川南其地在新鄭之東當為鄭地非周地也蓋此會此盟三國本欲就鄭是時莊公為周卿士故先會於河內之溫猶欲盟於近鄭之瓦屋鄭竟不至三國遂自為盟蓋鄭怨宋衛深陽許而實不欲平也是以十年鄭復伐宋觀會與盟之地可得其情矣溫今溫縣

八月丙戌鄭伯以齊人朝王禮也

善鄭伯不以虢公得政而失禮

公及莒人盟于浮來以成紀好去聲也

浮來紀地在今蒙陰成二年盟密之好

冬齊侯使來告成三國公使眾仲對曰君釋

三國之圖以鳩其民君之惠也寡君聞命矣
敢不承受君之明德

鳩集也

無駭卒羽父請諡與族公問族於眾仲眾仲
對曰天子建德因生以賜姓昨之士而命之
氏諸侯以字為諡因以為族官有世功則有
官族邑亦如之公命以字為展氏

天子賜姓因其所由生以賜之姓如舜由
媯汭故陳為媯姓其命氏則以土諸侯不
得賜姓命氏族而已其臣之氏以王父之
字為稱如伯氏叔氏孟孫氏叔孫氏國氏

高氏之類以字為諡因氏之如齊氏戴氏
是也其氏即以為族官有世功者如士氏
司城氏其居舊邑如韓氏魏氏東門氏皆
稟之於君以為氏族公以無駭為公子展
之孫因命其族為展氏鄭康成讀諸侯以
字為諡句謂因其字以為之諡如魯哀公
誅孔子稱字而諡以尼父也杜預以諸侯
以字為句則下為諡因以為族句難解不
從可

經九年春天王使南季來聘

無傳南氏季字
王朝之大夫也

王蓋再聘隱矣屢
書之重傷之也

三月癸酉大雨震電庚

辰大雨

去聲

挾卒

無傳挾之後無聞焉非
世卿也春秋之初猶近

古也後則無
不世者矣

夏城郎

秋七月

冬公會

同治八年謹遵

三傳寶文卷一隱公

三

齊侯于防

傳九年春王三月癸酉大雨霖以震書始也

庚辰大雨去聲雪亦如之書時失也凡雨自三

日以往為霖平地尺為大雪

書始謂雨始癸酉雪始庚辰書時失言三月今正月未可震電既震電又不當雪平

地尺

夏城郎書不時也

魯有兩郎隱元年費伯城郎在魚臺縣去魯遠此則魯近郊之邑桓十年齊衛鄭來戰於郎公羊傳云郎者何吾近邑也即此

宋公不王鄭伯為王左卿士以王命討之伐

宋宋以入郟之役怨公不告命公怒絕宋使

不王謂不共王職公為宋伐郟宋猶怨公故絕其使

秋鄭人以王命來告伐宋

遣使致王命以伐宋未得志謀更伐之

冬公會齊侯于防謀伐宋也

防魯地今費縣

北戎侵鄭鄭伯禦之患戎師曰彼徒我車懼

其侵軼音逸我也公子突曰使勇而無剛者嘗

同治八年謹遵

三傳讀本卷一 隱公

三

寇而速去之君為三覆以待之戎輕去聲而不

整貪而無親勝不相讓敗不相救先者見獲

必務進進而遇覆必速奔後者不救則無繼

矣乃可以逞從之戎人之前遇覆者奔祝聘

乃甘切逐之衷戎師前後擊之盡殪戎師大奔

十一月甲寅鄭人大敗戎師

戎鄭交兵道險我徒兵故鄭車師懼其侵軼鄭用公子突之謀設三覆使人嘗寇予

戎以獲而速退誘戎前進遇二覆而三覆兵起戎前進者在鄭三覆之衷乃盡殪其

後者不敢救亦大奔侵軼以道險故後荀吳亦崇卒道險則步卒利也此則引之至

坦夷處始與搏戰公子突鄭厲公也祝聘鄭大夫

經十年春王二月公會齊侯鄭伯于中丘

夏翬帥師會齊人鄭人伐宋六月壬戌公

敗宋師于菅古頑切辛未取郟音告辛巳取防

秋宋人衛人入鄭宋人蔡人衛人伐戴鄭伯

伐取之冬十月壬午齊人鄭人入郕

傳十年春王正月公會齊侯鄭伯于中丘癸

丑盟于鄧為師期

謀伐宋也中邱今蘭山縣鄧亦魯地以釋例推之癸丑乃正月二十六日經云二月

夏五月羽父先會齊侯鄭伯伐宋

先會非公本期

六月戊申公會齊侯鄭伯于老桃壬戌公敗

宋師于菅古頑切庚午鄭師入郕音告辛未歸于

我庚辰鄭師入防辛巳歸于我君子謂鄭莊

公於是乎可謂正矣以王命討不庭不貪其

土以勞去聲王爵正之體也

老桃宋地在今濟甯州北菅今單縣地郕今城武縣地防今金鄉縣地與九年會防

地別郕防地去鄭遠鄭不能有以與魯君子之言魯人自為說以誇美之

蔡人衛人邾人不會王命

不從伐宋

秋七月庚寅鄭師入郊猶在郊宋人衛人入

鄭蔡人從之伐戴八月壬戌鄭伯圍戴癸亥

克之取三師焉宋衛既入鄭而以伐戴召蔡

人蔡人怒故不和而敗

戴國在今考城時鄭師還駐兵於郊宋衛以奇兵乘虛入鄭因召蔡同伐戴蔡以不

揚杜注鄭師還駐兵於鄭似入下本無鄭字似以還字釋入字

同治八年謹遵

左傳卷之九

三

九月戊寅鄭伯入宋

報入鄭也

冬齊人鄭人入郕討違王命也

經十有一年春滕侯薛侯來朝 夏公會鄭

伯于時來 秋七月壬午公及齊侯鄭伯入

許 冬十有一月壬辰公薨

傳十一年春滕侯薛侯來朝爭長上聲薛侯曰

我先封滕侯曰我周之卜正也薛庶姓也我

不可以後之公使羽父請於薛侯曰君與滕

君辱在寡人周諺有之曰山有木工則度音鐸

之賓有禮主則擇之周之宗盟異姓為後寡

人若朝于薛不敢與諸任音壬齒君若辱貺寡

人則願以滕君為請薛侯許之乃長滕侯

滕姬姓國侯爵明年來朝稱子蓋時王所

貶今滕縣西南十四里是其都城薛狂姓

國奚仲之後夏時封其都在今滕縣南四

十里諸侯相朝所謂兩君之好大賓禮也

二君同時行禮故爭長滕先以同姓為卜

正周官下大夫秩公援宗盟載書先後之

夏公會鄭伯于邾音來謀伐許也鄭伯將伐許

同治八年謹遵

二專賣本卷一隱公

七

五月甲辰授兵於犬

音泰

宮公孫闕

音過

與潁考

叔爭車潁考叔挾輅以走子都拔棘以逐之

及大逵弗及子都怒

邾卽時來亦作釐在今祥符東十里許今許州姜姓國授兵者兵器謂戈車之類犬

宮鄭祖廟輅車輶子都公孫闕

鄭大夫棘戟也九逵謂之逵

秋七月公會齊侯鄭伯伐許庚辰傅音附于許

潁考叔取鄭伯之旗螯

音牟

弧以先登子都自

下射之顛瑕叔盈又以螯弧登周麾而呼

去聲

曰君登矣鄭師畢登壬午遂入許許莊公奔

衛齊侯以許讓公公曰君謂許不共

音恭

故從

君討之許既伏其罪矣雖君有命寡人弗敢

與

音預

聞乃與鄭人鄭伯使許大夫百里奉許

叔以居許東偏曰天禍許國鬼神實不逞于

許君而假手于我寡人寡人唯是一二父兄

不能共

音供

億其敢以許自爲功乎寡人有弟

不能和協而使餽

音胡

其口於四方其況能久

有許乎吾子其奉許叔以撫柔此民也吾將

使獲也佐吾子若寡人得沒于地天其以禮

悔禍于許無寧茲許公復奉其社稷唯我鄭國之有請謁焉如舊昏媾音其能降以相從也無滋他族實偏處此以與我鄭國爭此土也吾子孫其覆亾之不暇而況能禋音祀許乎寡人之使吾子處此不唯許國之為去聲亦聊以固吾圉也乃使公孫獲處許西偏曰凡而器用財賄無寘於許我死乃亟入聲去之吾先君新邑於此王室而既卑矣周之子孫曰失其序夫許犬音岳之肩也天而既厭周德

矣吾其能與許爭乎君子謂鄭莊公於是乎有禮禮經國家定社稷序民人利後嗣者也許無刑而伐之服而舍之度音德而處之量音力而行之相去聲時而動無累後人可謂知禮矣

鄭伯旗名螫弧師人所識考叔以登闕以爭車私嫌害之盈又以登明克許為鄭功許近鄭故齊不能有魯亦不受鄭伯以許東地與許莊公之弟許叔而其大夫百里奉之兩自有許西近鄭地使公孫獲治之其命百里之辭言鄭國中自不能供給億安有弟段亦寄食於外或許能自振當降心與鄭相從可以固邊陲其命獲言鄭

遷新鄭與許鄰周既不振許又太岳後未可滅及身尚可撫之沒世則當去許不可與爭君子所謂度德量力相時不累後人也環叔盈公孫獲皆鄭大夫

鄭伯使卒出玃

音加

行

音杭

出犬雞以詛

廁慮切

射

穎考叔者君子謂鄭莊公失政刑矣政以治

民刑以正邪既無德政又無威刑是以及邪

邪而詛之將何益矣

鄭伯不治公孫閱罪但使師中出玃犬雞為詛政刑兩失故君子譏之百人為卒二十五人為行

十五人為行

王取鄆

音伍

劉蔿

尤委切

邠

音子

之田于鄭而與鄭

人蘇忿生之田溫原絺樊隰郟攢

音攢

茅向盟

音孟州陘

音刑

隳

音積

懷

君子是以知桓王之失鄭

也恕而行之德之則也禮之經也已弗能有

而以與人人之不至不亦宜乎

鄆劉皆在今偃師蔿亦河南地四邑鄭邑也近於王故王取之蘇忿生周武王司寇蘇公也其田十二邑在河北遠於王且其裔叛王弗能有因以與鄭易也溫今溫縣原樊向今濟源絺隰郟州今河內攢茅隳今脩武盟今孟縣陘今河北近太行地太行有九陘懷今武陟縣西南十一里有懷城

鄭息有違言息侯伐鄭鄭伯與戰于竟

音境息

師大敗而還君子是以知息之將亾也不度德不量力不親親不徵辭不察有罪犯五不

韙音偉而以伐人其喪去聲師也不亦宜乎

息國今息縣姬姓國也言語相違即伐鄭是不徵辭不察有罪也犯五不韙謂五者皆息不是

冬十月鄭伯以虢師伐宋壬戌大敗宋師以報其入鄭也宋不告命故不書凡諸侯有命告則書不然則否師出臧否音鄙亦如之雖及滅國滅不告敗勝不告克不書于策

臧否謂善惡得失

羽父請殺桓公將以求大宰音泰公曰為去聲其少故也吾將授之矣使營菟平聲裘吾將老焉

羽父懼反譖公于桓公而請弒之公之為公子也與鄭人戰于狐壤止焉鄭人囚諸尹氏賂尹氏而禱於其主鍾巫遂與尹氏歸而立其主十一月公祭鍾巫齊支揆切于社圃館于

寫于委切氏壬辰羽父使賊弒公于寫氏立桓公而討寫氏有死者不書葬不成喪也

菟裘今泗水縣北在魯東公欲授桓位不可自居國中故營菟裘別邑以老狐壤者鄭地也尹氏鄭大夫鍾巫尹氏所主祭公為公子時與鄭戰為所止獲及從尹氏逃歸因立鍾巫歲祭之羽父者翬也欲殺桓媚公以求官公告以誠乃譖公於桓弒公以媚桓時公以鍾巫祭齋外館為氏為氏魯大夫也翬弒公而歸罪為氏討之有死者謂不足數之人不深竟其獄不成喪謂桓聽譖因忍而略其禮

欽定春秋左傳讀本卷一

欽定春秋左傳讀本卷二

桓元年盡十八年

桓公

名軌史記云名允惠公之子隱公之弟母仲子諡法僻土服遠曰桓

經元年春王正月公即位

三月公會鄭伯

于垂鄭伯以璧假許田

夏四月丁未公及

鄭伯盟于越

秋大水

冬十月

傳元年春公即位脩好

去聲

于鄭鄭人請復祀

周公卒易

入聲

田

必彭切

公許之三月鄭伯以

璧假許田為周公祊故也

隱八年鄭來歸祊未得許田今鄭請之仍以許田祀周公為名而復以璧假之若不

敢質言假者以其地有周公廟故傳曰為周公實則魯因受祜故傳又曰祜故也

夏四月丁未公及鄭伯盟于越結祜成也盟

曰渝音俞盟無享國

經言會于垂盟于越垂衛地今曹縣越近垂地渝謂更變

秋大水凡平原出水為大水

廣平曰原

冬鄭伯拜盟

諸侯來不見策書或有闕誤

宋華戶化切父督見孔父之妻于路目逆而送

之曰美而豔音焰

華父宋戴公後為華氏孔父弗父何後為孔氏孔父或云名父字嘉或云名嘉字父形美曰美色美曰豔未至則目逆既過則目送皆極視精不轉也

經二年春王正月戊申宋督弑其君與夷及

其大夫孔父滕子來朝無傳譏崇賊也隱強則朝隱桓弑則

朝桓不擇人而諂之宜其弱也書子時王黜之也滕侯也而稱子薛侯也而稱伯小邾無

爵而稱子王朝之黜陟不行於大而行於小春秋本王制以正名天子之事也然則滕子

無貶乎曰書來朝非禮可知也名爵自有定稱是非在乎其事不於事求義而以名稱為

衰貶斯害三月公會齊侯陳侯鄭伯于稷

以成宋亂 夏四月取郕古報切 大鼎于宋戊

申納于大音泰廟 秋七月杞侯來朝 蔡侯

鄭伯會于鄧 九月入杞 公及戎盟于唐

冬公至自唐

傳二年春宋督攻孔氏殺孔父而取其妻公

怒督懼遂弑殤公君子以督為有無君之心

而後動於惡故先書弑其君會于稷以成宋

亂為去聲賂故立華氏也宋殤公立十年十一

戰民不堪命孔父嘉為司馬督為大去聲宰故

因民之不堪命先宣言曰司馬則然已殺孔

父而弑殤公召莊公于鄭而立之以親鄭以

郕音告大鼎賂公齊陳鄭皆有賂故遂相去聲宋

公

督專殺大夫是有無君之心經先書弑君而後書殺孔父是斥其先有無君之心莊

公穆公子馮也稷宋地在今商邱郕國在今城武為宋所并故宋以其器賂魯諸侯

納賂而為督功立華氏為世卿十年十一戰皆以馮在鄭故宣言司馬則然者督欲

歸咎于孔父以集眾怨也後督孫華耦自言先臣督得罪殤公是非自不可掩

夏四月取郕大鼎于宋戊申納于大廟非禮

也。臧哀伯諫曰：君人者，將昭德塞違，以臨照百官。猶懼或失之，故昭令德以示子孫。是以

清廟茅屋，大路越席，大羹不致，粢音咨食音飼

不鑿，昭其儉也。衮冕黻，帶裳

幅，昭其度也。藻率

鞞，昭其數也。火

龍黼黻，昭其文也。五色比象，昭其物也。錫

鸞和鈴，昭其聲也。三辰旂，昭其明也。夫

德儉而有度，登降有數，文物以紀之，聲明以

發之，以臨照百官，百官於是乎戒懼而不敢

易紀律。今滅德立違，而寘音置其賂器於犬

廟，以明示百官，百官象之，其又何誅焉？國家

之敗，由官邪也。官之失德，寵賂章也。郕鼎在

廟，章孰甚焉？武王克商，遷九鼎于雒音洛，邑義

士猶或非之，而況將昭違亂之賂器於大廟

其若之何？公不聽。周內史聞之，曰：臧孫達其

有後於魯乎？君違，不忘諫之以德。

犬廟：周公廟。納朱賂，蓋以成宋為功。哀伯謂此乃滅德立違之事。哀伯，僖伯子，名達。

黻即詩之赤帶本作布
蔽膝也象形與下黼不
同古作黻以布為之

鞞鞞即詩之鞞鞞也
鞞鞞即鞞鞞也
鞞鞞即鞞鞞也

鞞鞞即詩之鞞鞞也
鞞鞞即鞞鞞也

言昭德塞違于制度見之故清廟則以茅飾大路則結草為車茵而不加緣大羹肉汁不致五味之和黍稷粢食不精鑿所以見其儉也章數衮服以下冕有旒數韋鞞蔽膝之黻及珽笏之制革帶之式下裳之章滕固股曰幅複履曰舄維持冠則有衡冠垂瑱則有紃纁冠則有纁纁上覆則有纁纁所以示制度也藉玉則有纁纁纁纁曰藻刷巾曰率佩刀之容上有鞞下有鞞大帶垂紳曰鞞其垂曰厲旌旗有游馬當胸有纁纁所以示尊卑之數也畫衣之火與龍繡裳之白黑斧曰黼青黑兩己相背曰黻所以示文章也車服器械章以五色比象四方上下所以示器有取則物不虛設也車馬之制刻金飾馬當額曰錫鈴在鑣當馬口兩旁曰鸞鈴在衡當馬頸上曰和其在旂則曰鈴是昭其聲也車旂之制畫日月星三辰于旂旗上是昭其明也凡此皆

昭德塞違故百官不敢易變紀律今滅德立違之器寘于廟則章示百官將恐百官象之雜邑遷鼎夷齊之屬猶或非之言綱常倫紀之際當深思而行也內史周大夫言桓違而達德達言督違而孔父德知當時皆罪華督

秋七月杞侯來朝不敬杞侯歸乃謀伐之

杞夏後姒姓國本居雍邱今河南杞縣地後入宋蓋宋侵得之杞遷東齊為今山東安邱地所謂洧于也隱四年經莒伐杞取牟婁牟婁今諸城縣地

蔡侯鄭伯會于鄧始懼楚也

鄧蔡地今鄧城縣東南公羊及賈逵服虔以為國名非也時楚武王始稱王

九月入杞討不敬也

公及戎盟于唐，脩舊好也。去聲

冬，公至自唐，告于廟也。凡公行，告于宗廟，反

行，飲至，舍音赦爵策勳焉。禮也。特相會，往來稱

地，讓事也。自參音三以上上聲，則往稱地，來稱會。

成事也。

飲至，謂勞酒。舍，置也。爵，飲器也。飲畢，置爵。即書勳勞於策。言速紀有功也。特，會讓事者。言兩國會，莫可為主，故但書地。三國以上，則有主之者，故往稱地，來稱會。

初，晉穆侯之夫人姜氏以條之役生大音泰子

命之曰仇，音求其弟以千畝之戰，生命之曰成

師。師服曰：異哉！君之名子也。夫名以制義，義

以出禮，禮以體政，政以正民，是以政成而民

聽。易入聲則生亂，嘉耦曰妃，怨耦曰仇。古之命

也。今君命犬子曰仇，弟曰成師，始兆亂矣。兄

其替乎？惠之二十四年，晉始亂，故封桓叔于

曲沃。靖侯之孫欒賓傳之。師服曰：吾聞國家

之立也，本大而末小，是以能固。故天子建國

諸侯立家，卿置側室，大夫有貳宗，士有隸子

弟，庶人工商各有分去聲，親去聲又如字皆有等衰。

初危切

是以民服事其上而下無覬

音冀覬音逾

今

晉甸

音旋

侯也而建國本既弱矣其能久乎惠

之三十年晉潘父弑昭侯而納桓叔不克晉

人立孝侯惠之四十五年曲沃莊伯伐翼弑

孝侯翼人立其弟鄂侯鄂侯生哀侯哀侯侵

涇庭之田涇庭南鄙啟曲沃伐翼

翼晉都也今翼城曲沃今聞喜條在今安邑千畝在今介休涇庭翼南鄙邑仇文侯

名成師桓叔名師服晉大夫譏穆侯命名非義懼文侯替廢後文侯立功周室見尚書名義和文侯卒子昭侯立始亂者懼成師不自安乃大封桓叔于曲沃以靖侯之

孫欒賓傅之靖侯桓叔之高祖父言得貴寵公孫為之傅相時適當魯惠公之二十四年也師服又譏之言晉乃甸服諸侯不應自別封國指陳天子乃建國諸侯則立家卿分為側室側室眾子也大夫有貳宗適子為小宗次子為貳宗士有隸子弟以其子弟為僕隸庶人自無爵然其家亦有分親以親疏為分別也必皆有等差所以無覬覦非望今晉兩失之

經三年春正月公會齊侯于嬴

音盈

夏齊侯

衛侯胥命于蒲 六月公會杞侯于郕 秋

七月壬辰朔日有食之既

無傳既盡也其變大矣春秋日食三

十六其既者三焉

公子翬如齊逆女

九月齊侯

送姜氏于謹

呼端切

公會齊侯于謹

無傳齊侯以送

姜氏來而公以會齊侯往其意在會不在逆女也輕禮而重勢也輕禮必不能盡倫倫失

則階厲重勢必不能守義義虧則召侮

夫人姜氏至自齊

無傳

不言翬以者既得見乎公也不言公以者不與公受姜氏于謹也因會乞婚因會成禮始

之不正庸人忽之君子懼焉

冬齊侯使其弟年來聘

有年

無傳有年者豐也歲有豐凶天之行也歲凶必書示人君先時警備及時軫恤

也豐則不書十二公惟桓書有年宣書大有年餘皆不書者常也桓宣何以書幸之也桓

一十八年止一有年宣十八年止一大有年他年之歉可知也

傳三年春曲沃武公伐翼次于陘庭韓萬御

戎梁弘為右逐翼侯于汾隰驂絰

音

而止夜

獲之及欒共

音叔

武公桓叔孫莊伯子也韓萬莊伯弟御戎僕也右戎車之右逐翼侯翼侯驂駢馬轡

絲絰結而止遂被獲欒共叔者欒賓子各事其主時傳翼侯汾隰謂汾水之隰

會于嬴成昏于齊也

音盈

嬴齊邑今泰安自會成昏不由媒介

夏齊侯衛侯胥命于蒲不盟也

蒲衛地今長垣地胥命申約言以相命不盟不歃血

公會杞侯于郕杞求成也

祀以二二年見伐故
未成邾今汶上地

秋公子翬如齊逆女修先君之好去聲故曰公

子齊侯送姜氏非禮也凡公女嫁于敵國姊

妹則上卿送之以禮於先君公子則下卿送

之於大國雖公子亦上卿送之於天子則諸

卿皆行公不自送於小國則上大夫送之

昏禮辭稱先君故逆使稱公子齊侯送
女謂送于謹謹在今甯陽西北魯地

冬齊仲年來聘致夫人也

女出嫁又隨加聘問所以存謙敬序殷勤
也在魯出使則曰致女他國來則總曰聘

故傳以致
夫人釋之

芮如銳伯萬之母芮姜惡去聲芮伯之多寵人

也故逐之出居于魏

芮魏皆姬姓國芮今蒲州
芮城魏今芮城東北地

經四年春正月公狩于郎夏天王使宰渠

伯糾來聘

傳四年春正月公狩于郎書時禮也

郎在今魚臺書時者冬獵
日狩周正月今之冬也

夏周宰渠伯糾來聘父在故名

宰官渠氏伯糾名父在者攝父職傳言天子大夫使列國當書字有所貶則書名武氏子不書名者彼不攝父職無爵可貶但書武氏子其義自見

秋秦師侵芮敗焉小之也

冬王師秦師圍魏執芮伯以歸

秦嬴姓國時有殺函以西地侵芮者責其出芮伯更立君輕其國小反為所敗故圍魏執芮舊君將欲納之此經無秋冬者文闕失

經五年春正月甲戌己丑陳侯鮑卒

夏齊侯鄭伯如紀天王使仍叔之子來聘

葬陳桓公無傳作當君在而殄君嗣君由是卒是賊也賊未討而葬君魯

不討而往會焉故書以著其罪城祝丘無傳備齊也公將抗齊以存紀故備

之夏城之不時也秋蔡人衛人陳人從王伐鄭

大雩無傳蝗也常因旱而生志災以憫民也冬州公如

曹

傳五年春正月甲戌己丑陳侯鮑卒再赴也

於是陳亂文公子佗音駝殺犬音泰子免音問而代

之公疾病而亂作國人分散故再赴

陳侯鮑陳桓公甲戌四年十二月二十一日己丑此年正月六日國亂故再赴明年蔡人殺佗佗稱文公子明非桓公母弟

夏齊侯鄭伯朝于紀欲以襲之紀人知之

紀今壽光知其謀懼而來告魯亦城祝邱今蘭山東南

王奪鄭伯政鄭伯不朝

秋王以諸侯伐鄭鄭伯禦之王為中軍虢公

林父將

去聲下同

右軍蔡人衛人屬

音蜀下同

焉周公

黑肩將左軍陳人屬焉鄭子元請為左拒以

當蔡人衛人為右拒以當陳人曰陳亂民莫

有鬪心若先犯之必奔王卒顧之必亂蔡衛

不枝固將先奔既而萃於王卒可以集事從

之曼

音萬

伯為右拒祭

音蔡下同

仲足為左拒原繁

高渠彌以中軍奉公為魚麗

平聲

之陳先偏

後伍伍承彌縫戰于繻

音須

葛命二拒曰旻

音檜

動而鼓蔡衛陳皆奔王卒亂鄭師合以攻之

王卒大敗祝聃射王中

去聲

肩王亦能軍祝聃

請從之公曰君子不欲多上人況敢陵天子

乎苟自救也社稷無隕多矣夜鄭伯使祭足

勞

去聲

王且問左右

隱八年虢公忌父為王卿士九年傳言鄭伯為王左卿士則虢為右此年周公黑肩

為左卿士。號公林父。為右卿士。鄭不復入。
 仕于周。桓王以其不朝伐之。子元。鄭公子。
 為左右拒。謂為兩方。陳萃。謂聚攻。王卒。謂
 中軍。集事。謂成功。魚麗之陳。謂以車兵二
 十五乘。名偏者。居先。而後以徒兵之伍。伍
 承偏之。後彌縫其隙。繻葛。今長葛縣。鄭地
 也。周官司常。云通帛。為旛。旛。即旗也。鄭命
 二拒。見中軍。旛動。則鼓而前攻。王自在軍
 中。祝聃射中之。王亦能軍。敗而不奔也。鄭
 不敢復逼王。乃收兵自退。勞王問左右。鄭
 之詐也。鄭言不欲多上人。言常人且不可
 多方。陵上之。左氏古文賈逵說。旛為發石
 一曰。飛石。說文於部。旛云。建大木置石其
 上。發以機。以碓敵。亦左氏古文。義三軍人
 眾。列陳路遠。發石之動。無能具見。不能以
 準鼓候。不若通帛之動。有據而易見也。曼
 伯檀伯也。

仍叔之子弱也

仍叔。天子大夫。其子來聘。成禮于夏。故經
 書于夏。傳釋之。繻葛秋戰後。言童子將命。
 無速反之心。久留魯國。

秋大雩書不時也。凡祀啟蟄。而郊龍見

現音而雩始殺而嘗。閉蟄而烝。過則書。

傳復舉秋者。以明不時。凡常祀有時。魯以
 周公後得郊。寅月郊。以祈穀也。啟蟄。漢以
 前為寅月。中氣驚蟄。為卯月初法。後始改雨水
 為寅月。中氣驚蟄。為卯月節氣。龍見而雩。
 亦常雩。龍謂角亢。為蒼龍宿。建巳之月。蒼
 龍之宿。昏見於東方。則雩祭。雩之言遠也。
 遠為百穀。祈膏雨。過時不雨。則又雩。雩。吁
 也。謂旱則吁嗟哭泣。以求雨。始殺而嘗者。

陰氣始殺。建酉月也。嘉穀登。嘗于廟。閉蟄。建亥月。萬物既成。可薦者眾。故烝祭廟。烝之言眾也。此言秋雩。周秋。午未申月。過龍見之時。

冬。涓于公如曹。度其國危。遂不復。

涓于州都。今安邱縣地。州。姜姓國。公爵。曹。今定陶。時州有危難。其君自度不能保。遂不復國。謂明年遂如魯也。涓于此後為杞所有。

經六年春正月寔來。夏四月公會紀侯于

成。秋八月壬午大閱。蔡人殺陳佗。九

月丁卯子同生。冬紀侯來朝。

傳六年春自曹來朝。書曰寔來。不復其國也。

言州公來奔。則行朝禮。言州公來朝。則遂畱不去。故變文曰寔來。寔實也。

楚武王侵隨。使遠于委章求成焉。軍於瑕。以

待之。隨人使少師董成。鬬伯比言於楚子曰。

吾不得志於漢東也。我則使然。我張吾三軍。

而被皮寄吾甲兵。以武臨之。彼則懼而協以

謀我。故難去聲閔也。漢東之國隨為大。隨張去聲

又如必棄小國。小國離。楚之利也。少師侈。請

羸劣追師以張之。熊率音律且音疽比曰。季梁在

何益。鬬伯比曰。以為後圖。少師得其君。王毀

說至平子曰肥豕曰臚豕
豕通言之也豕曰肥豕曰臚豕
豕不可言肥豕不可言臚豕
據此傳之意肥豕指皮膚充
滿脂指豕曰備具

軍而納少師少師歸請追楚師隨侯將許之
季梁止之曰天方授楚楚之羸其誘我也君
何急焉臣聞小之能敵大也小道大淫所謂
道忠於民而信於神也上思利民忠也祝史
正辭信也今民餒而君逞欲祝史矯舉以祭
臣不知其可也公曰吾牲牷肥臚音臚粢盛音成
豐備何則不信對曰夫民神之主也是以聖
王先成民而後致力於神故奉牲以告曰博
碩肥臚謂民力之普存也謂其畜之碩大蕃

滋也謂其不疾瘵音瘵蠹音蠹也謂其備臚咸有

也奉盛以告曰絜粢豐盛謂其三時不害而

民和年豐也奉酒醴以告曰嘉粟旨酒謂其

上下皆有嘉德而無違心也所謂馨香無讒

慝音忒也故務其三時脩其五教親其九族以

致其禋祀於是乎民和而神降之福故動則

有成今民各有心而鬼神之主君雖獨豐其

何福之有君姑脩政而親兄弟之國庶免於

難去聲隨侯懼而脩政楚不敢伐

楚子爵羊姓國始都丹陽今歸州徒丹陽
 今枝江徒郢今江陵世本云武王熊達都
 郢史記云文王熊賁始都郢案傳沈尹戊
 曰若敖蚡冒至于武文土不過圻猶不城
 郢則楚之都郢并不始於武文蓋經營之
 數世至武文而始定耳隨侯爵姬姓國今
 隨州瑕隨地楚時方盛侵隨而求成即所
 以張隨使自侈大因棄諸鄰小國楚得取
 之少師隨大夫隨侯使董正成事不知楚
 師偽羸弱既成又追擊之季梁諫止也祝
 史矯舉以祭言祝辭無實功德可稱牲牲
 謂毛體正完肅亦肥也瘕蠶皮病備肅咸
 有言牧養求索無闕嘉栗德美而意謹敬
 也隨侯不追楚敗成約又修政故楚置之
 九族多異義古尚書說四五屬之內為一族
 九尚書歐陽說父族四五屬之內為一族
 父女昆弟適人者與其子為一族已之
 弟適人者與其子為一族已之女子子適

人者與其子為一族母族三母之父姓為
 一族母之姓為一族母女昆弟適人者
 與其子為一族妻族二妻之父姓為一族
 妻之母姓為一族杜預說九族與歐陽畧
 同唯不數己之同族而專指外親之有服
 者遂不可通矣鬪伯比熊率且比皆楚大
 夫季梁隨賢臣

夏會于成紀來諮謀齊難去聲也

成魯地在今甯陽齊欲滅紀故來謀之訪於善為諮諮難為謀

北戎伐齊齊侯使乞師于鄭鄭犬音泰子忽帥

師救齊六月大敗戎師獲其二帥所類大良

少良甲首三百以獻於齊於是諸侯之大夫

戊齊，齊人饋之餼。

許既切

使魯為其班，後鄭鄭

忽以其有功也。怒，故有郎之師。公之未昏於

齊也。齊侯欲以文姜妻

去聲

鄭。犬子忽，犬子忽

辭人問其故。犬子曰：「人各有耦，齊大，非吾耦

也。」詩云：「自來多福，在我而已。」大國何為？君子

曰：「善自為謀，及其敗，戎師也。」齊侯又請妻之。

固辭。人問其故。犬子曰：「無事於齊，吾猶不敢。

今以君命奔齊之急，而受室以歸，是以師昏

也。民其謂我何？遂辭諸鄭伯。

甲首被甲者首，牲腥曰餼。魯以爵為班，抑鄭之功，故鄭怒。郎之師在十年。犬子忽辭齊昏以禮。君子善其自為謀，言惜失強援，謀不及國也。繼又辭師昏，假鄭伯之命為辭，俱得其正。

秋，大閱，簡車馬也。

非時簡閱，備鄭怒也。

九月，丁卯，子同生，以犬

音泰

子生之禮舉之，接

以犬

音泰

牢，卜士負之，士妻食

音飼

之。公與文姜

宗婦命之。公問名於申繻。

音須

對曰：「名有五，有

信，有義，有象，有假，有類，以名生為信，以德命

為義以類命為象取於物為假取於父為類
 不以國不以官不以山川不以隱疾不以畜
 牲不以器幣周人以諱事神名終將諱之故
 以國則廢名以官則廢職以山川則廢主以
 畜牲則廢祀以器幣則廢禮晉以僖侯廢司
 徒宋以武公廢司空先君獻武廢二山是以
 大物不可以命公曰是其生也與吾同物命
 之曰同

備犬子生之禮故書于策不稱犬子者書始生也接以犬牢謂以禮接夫人其禮見

內則鄭康成讀接為捷捷勝也謂以太牢食其母使補虛強氣食之謂乳母命之謂命名名生者若唐叔虞魯季友德命若文王昌武王發類象若孔子首象尼山假物若伯魚生人有饋之魚因名取于父為類則若子同生與父同日是也其不應以名者國則晉侯周衛侯晉陳侯吳官與山川則晉宋魯君隱疾則晉侯黑鬻畜牲謂六畜器幣謂禮器玉帛晉諱司徒廢此官宋諱司空改司城魯諱具敖以其鄉名山今新秦東南有此二山相去十五里杜預以周人以諱事神名為句眾家多以名字屬下句今從杜

冬紀侯來朝請王命以求成于齊公告不能

紀微弱不能自通於天子欲因公以請王命公無寵於王故告不能

經七年春二月己亥焚咸丘

無傳火田也咸邱地名古者昆

蟲蟄而後火田蓋去莽翳以逐禽獸耳書焚咸邱則盡其地而淫獵矣蒐狩之制講禮非尚殺也訓軍非盡物也淫獵則殺不以禮而物盡故譏之

夏穀伯綏來

朝 鄧侯吾離來朝

傳七年春穀伯鄧侯來朝名賤之也

穀今穀城鄧今鄧州近楚國遠來朝魯以禮不足賤稱名傳言以春來經書夏者夏始行禮是年二月焚咸邱夏正之十二月火田也咸邱今鉅野地經無秋冬亦文闕

夏盟 向來成于鄭既而背之

秋鄭人齊人衛人伐盟向王遷盟向之民于

邾 古洽切

盟向二邑必有主據之言求成于鄭是主未成也隱十一年王與鄭傳稱王不能有然則鄭雖得之亦不能有故今始求成既而背之是背鄭歸王故王遷其民于邾邾王城今洛陽也

冬曲沃伯誘晉小子侯殺之

曲沃伯武公也小子侯哀侯子

經八年春正月己卯烝

無傳冬祭曰烝周之春夏之冬烝時也何

以書胡安國曰非為不時志也為再烝書也

天王使家父來

聘無傳家氏父字王之大夫也王蓋三聘桓矣下書逆后則此之聘蓋言婚紀乎婚紀

曷為與魯言魯請之也魯欲存紀因為紀謀
俾納女於王託王為重焉王娶后以母天下
乃輕徇魯請可乎哉夏五月丁丑烝無傳五月建辰
祭為祠今蓋以烝代祠也四時之祭惟烝為
腆冬則物備也非冬而烝亟也一歲二烝黷

也時祭當用夏之孟月若有故及日不吉用
仲月今用建辰則季月也又過時而慢矣皆
非禮秋伐邾無傳滕紀穀鄧皆朝而邾不

也冬十月雨去聲雪無傳周十月夏之八月不
應雨雪書以紀異且明害

冬十月雨

去聲

雪

無傳周十月夏之八月不
應雨雪書以紀異且明害

稼也祭音蔡公來遂逆王后于紀

傳八年春滅翼

曲沃滅之

隨少師有寵楚鬪伯比曰可矣讎有釁

許覲切

不可失也夏楚子合諸侯于沈鹿黃隨不會

使遠章讓黃楚子伐隨軍於漢淮之間季梁

請下

去聲

之弗許而後戰所以怒我而怠寇也

少師謂隨侯曰必速戰不然將失楚師隨侯

禦之望楚師季梁曰楚人上左君必左無與

王遇且攻其右右無良焉必敗偏敗眾乃攜

矣少師曰不當王非敵也弗從戰于速杞隨

師敗績隨侯逸鬪丹獲其戎車與其戎右少

師秋隨及楚平楚子將不許鬪伯比曰天去

上聲其疾矣隨未可克也乃盟而還

隨今隨州黃今光州沈鹿今鍾祥縣地漢淮之閔今隨州東南也速杞即漢淮之閔覺謂其失政瑕隙下之請服也下楚而楚弗許則隨人怒楚人怠季梁知楚君在楚左軍欲先攻其右皆不見用而敗隨少師為戎右見獲故曰天去其疾鬪丹楚大夫

冬王命虢仲立晉哀侯之弟緡于晉

虢仲王卿士虢公林父

祭公來遂逆王后于紀禮也

祭音蔡今鄭州地時在周圻內與鄭祭之在長垣者別言來遂逆者王使魯主昏故來受

命即行

經九年春紀季姜歸于京師夏四月秋

七月冬曹伯使其世子射姑來朝

傳九年春紀季姜歸于京師凡諸侯之女行

唯王后書

逆稱王后自逆者言之歸稱季姜自歸者言之

巴子使韓服告于楚請與鄧為好楚子使道

朔將巴客以聘於鄧鄧南鄙鄭人攻而奪之

幣殺道朔及巴行人楚子使遠章讓於鄧鄧

同治八年謹遵

三傳讀本卷二十一桓公

三

人弗受夏楚使鬪廉帥師及巴師圍鄆鄧養

甥聘甥帥師救鄆三逐巴師不克鬪廉衡

音橫

陳去聲其師於巴師之中以戰而北鄧人逐之

背巴師而夾攻之鄧師大敗鄆人宵潰

巴今重慶巴縣鄧今鄧州自巴至鄧應道楚故楚使人將之鄆今襄陽縣東北在鄧

南沔水北也弗受謂不任其過不克謂楚巴不能克鄧鬪廉分陳巴師以楚師衡陳

其中戰而佯北鄧人逐之則巴師在鄧之背楚巴於是夾攻之韓服巴行人巴客指

韓服道朔遷章鬪廉楚大夫養甥聘甥鄧大夫

秋號仲芮伯梁伯荀侯賈伯伐曲沃

號今陝州芮今同州大荔梁今同州韓城荀今絳州東北賈亦在今絳州五國共伐

曲沃蓋為晉討

冬曹大音泰子來朝賓之以上卿禮也享曹大

子初獻樂奏而歎施父音甫曰曹大子其有憂

乎非歎所也

曹大子桓公子莊公射姑也曹伯有疾故使其子來朝禮諸侯之嫡子攝其君未誓于天子則以皮帛繼子男此賓之以上卿之禮謂出入三種食三牢一享一食宴之歎者思父疾施父魯大夫聞其歎知之

經十年春王正月庚申曹伯終生卒 夏五

同治八年謹遵

三傳讀本卷之二桓公

三

月葬曹桓公

無傳五月而葬正也諸侯五月同盟至魯會之禮也

秋

公會衛侯于桃丘弗遇

無傳期而不信也衛中變而公獨至故弗

遇齊鄭急於圖紀魯欲存之伐鄭之役衛實從王是與鄭有隙矣故魯桓求會焉將以為援也然蒲之胥命衛與齊有舊好矣衛初以鄭故約會終以齊故中更於是更有郎之戰書弗遇惡

無信也

冬十有二月丙午齊侯衛侯鄭伯

來戰于郎

傳十年春曹桓公卒

終施父之言

虢仲譖其大夫詹父

音甫

於王詹父有辭以王

師伐虢

夏虢公出奔虞

虢仲周右卿士詹父卿士屬下大夫也虞今山西平陸

秋秦人納芮伯萬于芮

四年圍魏所執者

初虞叔有玉虞公求旃

音體

弗獻既而悔之曰

周諺有之匹夫無罪懷璧其罪吾焉

音烟

用此

其以賈

音古

害也乃獻之又求其寶劍叔曰是

無厭

音淹

也無厭將及我遂伐虞公故虞公出

同治八年謹遵

三傳賈公彥一桓公

三

奔共音恭池

虞姬姓國仲雍後居今平陸虞叔虞公之弟言虞公貪以出奔共池今平陸西四十里許與讓畔城相近周諺有之文選鷓鴣賦注引云周任有言蓋古語言人利其有可以致禍

冬齊衛鄭來戰于郎我有辭也初北戎病齊諸侯救之鄭公子忽有功焉齊人餽諸侯使魯次之魯以周班後鄭鄭人怒請師於齊齊人以衛師助之故不稱侵伐先書齊衛王爵也

郎今魚臺在魯西南蓋齊人遠就衛鄭之師也言來戰者明魯直有辭交綏而退無敗績六年魯大閱此年秋公會衛侯于桃邱衛侯背公更與齊鄭故公會不遇魯益知有師來而為之備也桃邱今東阿地當屬齊杜預云衛地恐非鄭主兵而序齊衛下者以王爵次之

經十有一年春正月齊人衛人鄭人盟于惡

曹夏五月癸未鄭伯寤生卒秋七月葬

鄭莊公無傳逾兩月而葬速也時九月宋

人執鄭祭仲突歸于鄭鄭忽出奔衛柔會

宋公陳侯蔡叔盟于折無傳柔魯卿也不氏未賜族也蔡侯無子

同治八年謹遵

三專賣本卷一桓公

三

蔡叔蔡侯之弟以國繫字示兄終弟及之義也魯以郎之敗而求宋陳蔡蓋以敵齊鄭也然以大夫盟諸侯非禮矣內大夫帥師自無駭始與諸侯盟自柔始公會宋

公于夫鍾

無傳陳蔡一盟即合魯嘗敗宋而取其邑折之盟公又不往宋疑焉

故公親會以求之也

冬十有二月公會宋公于闕

口暫

切無傳冬又會亟求之也

傳十一年春齊衛鄭宋盟于惡曹

經無宋傳備言之惡曹地闕

楚屈瑕將盟貳軫鄖

音云人軍於蒲騷

音蕭又音縲

將與隨絞

古卯切

州蓼

音了

伐楚師莫敖

平聲患之

鬪廉曰鄖人軍其郊必不誠且日虞四邑之

至也君次於郊郢

音穎

以禦四邑我以銳師宵

加於鄖鄖有虞心而恃其城莫有鬪志若敗

鄖師四邑必離莫敖曰盍請濟師於王對曰

師克在和不在眾商周之敵君之所聞也

成軍以出又何濟焉莫敖曰卜之對曰卜以

決疑不疑何卜遂敗鄖師於蒲騷卒盟而還

貳國今應山縣軫國今應城縣西鄖亦作

損今安陸蒲騷鄖邑今應城北隨國今隨

州絞國今鄖縣州國今荊州監利蓼國今

南陽唐縣郊郢今鍾祥莫敖楚官名即屈

瑕也。濟師謂益師。鄭人將阻楚盟。自恃蒲騷地近。而侯隨絞州蓼之師。因而致敗。

鄭昭公之敗北戎也。齊人將妻之。去聲昭公辭

祭仲曰。必取之。君多內寵。子無大援。於着切將

不立。三公子皆君也。弗從。

夏鄭莊公卒。初祭音蔡封人仲足有寵於莊公。

莊公使為卿。為去聲公娶鄧曼。生昭公。故祭仲

立之。宋雍氏女去聲於鄭莊公曰雍姞。其吉切生

厲公。雍氏宗有寵於宋莊公。故誘祭仲而執

之。曰。不立突。將死。亦執厲公而求賂焉。祭仲

與宋人盟。以厲公歸而立之。

秋九月丁亥。昭公奔衛。己亥。厲公立。

鄭昭公莊公世子忽也。厲公子突也。又子

廩子儀之母皆有寵。祭封人仲足。即祭仲。

祭。今長垣。與鄭州。圻內祭別。三公子謂

厲公及子儀。子廩。三人母皆有寵。皆可奪

嫡。昭公辭齊婚。以禮。鄭人以突。因母家強。

遂咎昭公。失強援。愛之深。故咎之。亦切。前

年鄭與齊衛來戰于郎。今年又盟于惡曹。

故今年經於秋冬。書三會。宋公。夫鍾。邾地。

經十有二年春正月。夏六月壬寅公會杞

侯莒子盟于曲池。秋七月丁亥公會宋公

燕人盟于穀丘 八月壬辰陳侯躍卒

無傳新盟

于折不葬非禮也

公會宋公于虛 冬十有一月

公會宋公于龜 丙戌公會鄭伯盟于武父

丙戌衛侯晉卒

無傳再書丙戌因舊史也

十有二月

及鄭師伐宋丁未戰于宋

傳十二年夏盟于曲池平杞莒也

曲池魯地今曲阜縣北平隱四年莒伐杞之怨

公欲平宋鄭秋公及宋公盟于句

音澆音之

丘宋成未可知也故又會于虛冬又會于龜

宋公辭平故與鄭伯盟于武父

音甫

遂帥師而

伐宋戰焉宋無信也君子曰苟信不繼盟無

益也詩云君子屢

平聲

盟亂是用長

上聲

無信也

宋以立厲公故多責賂于鄭鄭人不堪公欲平之宋公貪鄭賂與公三會而卒辭不與平故盟鄭而伐宋穀邱宋地即句澆之邱緩言句澆合音則穀也今商邱南四十里有穀邱曹縣東北三十里亦有穀邱虛龜皆宋地疑在今睢州境武父鄭地今東明地也

楚伐絞軍其南門莫敖屈瑕曰絞小而輕

遣政

切輕則寡謀請無扞

戶旦切

采樵者以誘之從

之絞人獲三十人明日絞人爭出驅楚役徒

於山中楚人坐其北門而覆扶又切諸山下大

敗之為城下之盟而還伐絞之役楚師分涉

於彭羅人欲伐之使伯嘉謀徒協切之三巡數

上聲之

無扞采樵者不衛采樵之人使絞獲之因坐守其門使不得歸而設伏敗其出逐之

人也彭水在今房縣境下入漢羅熊姓國今宜城謀何也蓋備楚又欲伐其師明年

楚遂伐羅

經十有三年春二月公會紀侯鄭伯己巳及

齊侯宋公衛侯燕人戰齊師宋師衛師燕師

敗績三月葬衛宣公無傳嗣子朔敗績而歸乃葬其親甚哉其

不仁也魯與衛戰乃會其葬是知古人以葬為重也怨不棄義怒不廢禮惡不忌親

夏大水無傳秋七月冬十月

傳十三年春楚屈瑕伐羅鬪伯比送之還謂

其御曰莫敖必敗舉趾高心不固矣遂見音現

楚子曰必濟師楚子辭焉入告夫人鄧曼鄧

曼曰大夫其非眾之謂其謂君撫小民以信

訓諸司以德而威莫敖以刑也莫敖狃於蒲

騷之役將自用也必小羅君若不鎮撫其不
 設備乎夫固謂君訓眾而好鎮撫之召諸司
 而勸之以令德見莫敖而告諸天之不假易
 也音異不然夫豈不知楚師之盡行也楚子使
 賴人追之不及莫敖使徇以俊切于師曰諫者
 有刑及鄔音偃亂次以濟遂無次且不設備及
 羅羅與盧戎兩軍之大敗之莫敖縊于荒谷
 羣帥囚于冶父音甫以聽刑楚子曰孤之罪也
 皆免之

羅今宜城賴今隨州北地鄔水在宜城入漢盧戎在今南漳縣東荒谷今江陵西冶父今江陵東鬪大夫見莫敖驕而難言其敗故言必濟師意謂此行不能必勝也莫敖狃於成見不設備欲以誘羅遂以自敗狃習也鄧曼楚武王夫人賴人賴國之人仕於楚者

宋多責賂於鄭鄭不堪命故以紀魯及齊與
 宋衛燕戰不書所戰後也

齊衛燕助宋燕南燕也兩敵將戰必豫期戰地公未見紀鄭紀鄭已與齊宋先設戰期公不及設期唯及其戰故言戰而不書所戰之地言此地非公所期故不書也

鄭人來請脩好去聲

經十有四年春正月公會鄭伯于曹 無冰

無傳煥而無冰蓋政治縱弛不明之所致也

氣失藏而萬化乖其理矣劉向日周失之舒

秦失之急故周衰無 夏五鄭伯使其弟語

寒歲秦末無煥年 來盟 秋八月壬申御廩 力錦 切 災乙亥嘗

冬十有二月丁巳齊侯祿父卒 無傳祿父有 圖伯之志晚

從鄭伯貪利忘義以紀故遂與魯陳兵敗而

抑鬱以死寤生悞之也易曰比之匪人不亦

乎傷 宋人以齊人蔡人衛人陳人伐鄭

傳十四年春會于曹曹人致餼禮也

熟日饗 生日餼

夏鄭子人來尋盟且脩曹之會

子人即弟語其後為子人氏 經書夏五下無文蓋文闕失

秋八月壬申御廩災乙亥嘗書不害也

御廩公親耕所斂粢盛之廩天火曰災乙 亥日嘗當以前三日致齋壬申即致齋日

災其屋不及 穀故言不害

冬宋人以諸侯伐鄭報宋之戰也焚渠門入

及大逵伐東郊取牛首以犬宮之椽 音 歸

為盧門之椽

渠門鄭城門大逵城中道牛首鄭東郊邑 在今陳畱縣西十一里太宮鄭廟盧門宋

城門。圓曰椽。方曰楬。毀人廟椽。置之。城門。自旌其功。

經十有五年春二月天王使家父音甫來求車

三月乙未天王崩無傳。桓王也。魯朱弒君不能討。喪師於鄭。凌夷。

甚矣。西周之不復。平王為之也。東周之不振。桓王為之也。夏四月己巳

葬齊僖公無傳。齊僖與魯屢尋干戈而會葬。如禮。王崩則莫之赴。比事以觀其

罪見矣。五月鄭伯突出奔蔡鄭世子忽復歸

于鄭許叔入于許公會齊侯于艾邾

人牟人葛人來朝無傳。三國皆附庸也。何以稱人。杜預曰。皆附庸世子

也。其君書字書名。故其世子降而稱人。是也。王喪未逾年而行嘉禮。桓不赴。王喪儼受人

之朝且旅見焉。重譏之。秋九月鄭伯突入于櫟音厯

冬十有一月公會宋公衛侯陳侯于袤音侈伐

鄭

傳十五年春天王使家父音甫來求車非禮也

諸侯不貢車服天子不私求財

家氏父字。言諸侯有常職。貢上下俱不當廢禮。

祭仲專鄭伯患之使其壻雍糾殺之將享諸

郊雍姬知之謂其母曰父與夫孰親其母曰

人盡夫也父一而已胡可比也遂告祭仲曰

同治八年謹遵

三專賣下卷二桓公

三

尺盡也。也。唐律疏義引作人盡夫也。玩杜注在案。則天父出嫁則夫知舊本作无

雍氏舍其室而將享子於郊。吾惑之以告祭仲。殺雍糾。尸諸周氏之汪。公載以出。曰：謀及婦人，宜其死也。

夏厲公出奔蔡。

六月乙亥，昭公入。

厲公篡立，又失政刑，與小臣比而賊殺，非禮也。昭公當立，故春秋本莊公世子書之，以正其名。周氏，鄭大夫汪池也。雍糾，杜預謂之小臣。賈逵云：鄭大夫公愍。雍糾見殺，故載其尸以出。

許叔入于許。

終隱公十一年，鄭莊之言。

公會齊侯于艾，謀定許也。

艾山，在今萊蕪。時邾人牟人葛人來朝魯。邾，今鄒縣。牟，今萊蕪。葛，今甯陵。皆附庸國。

秋，鄭伯因櫟人殺檀伯而遂居櫟。

音歷

櫟，鄭別都，今許州地。檀伯，鄭守櫟大夫。

冬，會于袤，謀伐鄭，將納厲公也。弗克而還。

袤，宋地，在今宿州西。此魯宋衛陳會也。公羊經有齊侯五國會。

經十有六年春正月公會宋公蔡侯衛侯于

曹。夏四月公會宋公衛侯陳侯蔡侯伐鄭。

秋七月公至自伐鄭 冬城向 十有一

月衛侯朔出奔齊

傳十六年春正月會于曹謀伐鄭也

夏伐鄭秋七月公至自伐鄭以飲至之禮也

冬城向書時也

向地闕此冬下有十一月事則此為十月而杜預以為亦俱是十一月又以長麻推是年閏六月冬節較早故建戌之月亦可書時

初衛宣公烝於夷姜生急子屬音燭諸右公子

為去聲之娶於齊而美公取之生壽及朔屬壽

於左公子夷姜縊宣姜與公子朔構古豆切急

子公使諸齊使盜待諸莘將殺之壽子告之

使行不可曰弃父之命惡音烏用子矣有無父

之國則可也及行飲去聲以酒壽子載其旌以

先盜殺之急子至曰我之求也此何罪請殺

我乎又殺之二公子故怨惠公十一月左公

子洩右公子職立公子黔音琴牟惠公奔齊

夷姜宣公庶母上淫曰烝朔惠公也左右公子左右勝之子因以為號蓋宣公兄弟宣姜欲立其子故欲殺急子莘今莘縣在衛齊道上史記云公與太子白旄而告盜

曰見白旄者殺之壽子知之勸急子使出奔急子不從壽子先往而死是以人皆惡朔公子黔牟亦宣公子

經十有七年春正月丙辰公會齊侯紀侯盟于黃 二月丙午公會邾儀父盟于趨翠軌切

夏五月丙午及齊師戰于奚 六月丁丑

蔡侯封人卒 秋八月蔡季自陳歸于蔡

癸巳葬蔡桓侯

無傳諡稱公非正也臣子之辭也稱本爵正也天王誅之

也晉侯仇卒於平王之世諡曰文侯是也蔡桓書侯蓋告王請諡禮也

及宋

人衛人伐邾 冬十月朔日有食之

傳十七年春盟于黃平齊紀且謀衛故也

黃齊地今黃縣齊欲滅紀此為平之衛時出其君

及邾儀父盟于趨翠軌切尋蔑之盟也

趨魯地當在今泗水鄒縣之閔蔑盟在隱元年

夏及齊師戰于奚疆事也於是齊人侵魯疆

疆吏來告公曰疆場音亦之事慎守其一而備

其不虞姑盡所備焉事至而戰又何謁焉

奚魯地今滕縣西南春盟而夏來戰又齊師遠出魯西南知是疆場小故公戒疆吏盡備而已

蔡桓侯卒。蔡人召蔡季于陳。

桓侯無子。故召弟而立之。

秋。蔡季自陳歸于蔡。蔡人嘉之也。

蔡人嘉之。故以字書。蔡季名獻舞。為蔡哀侯。

伐邾。宋志也。

邾宋爭強。魯背趙盟助宋。

冬。十月。朔。日有食之。不書。日官失之也。天子

有日官。諸侯有日御。日官居卿。以底日。禮也。

日御不失日。以授百官于朝。

凡合朔。日月交。則有日食。行度有大量。不能不小。有贏縮。故有交會不食者。古法不加推算。以食為災咎。不言月食日。但言日有食之者。謹慎之辭。其不言甲子者。官失之。不言朔者。或是官失。或食二日。或食晦。由其時合朔法疎。東漢始課日食。疎密。春秋史官所不曉也。此不書日之甲子。亦是官失。日官日御。典算之官。居卿者。服虔云。使卿居其官。以主之。杜預云。不在六卿之數。而位從卿。底。平也。謂平麻數。不失日。謂守天子所頒朔日。

初。鄭伯將以高渠彌為卿。昭公惡之。固

去聲下同。

諫。不聽。昭公立。懼其殺已也。辛卯。弑昭公。而

立公子亶。君子謂昭公知所惡矣。公子達

曰高伯其為戮乎復惡已甚矣

高渠彌迨事鄭莊公鄭伯謂莊公也子亶昭公弟公子達魯大夫復重也本為昭公所惡而復弑君重為惡也或曰復猶報也

經十有八年春王正月公會齊侯于灤

盧篤切又

音洛公與夫人姜氏遂如齊 夏四月丙子公

薨于齊 丁酉公之喪至自齊

無傳傷之也不生還而喪

至所以發魯之臣子不共戴天之憤也

秋七月

冬十有二

月己丑葬我君桓公

無傳公以喪歸而成禮以葬蓋當其時欲以混

乎被弑之迹與夫人之與聞乎弑也春秋因魯史之舊文以著其實之不可掩且在臣子

有不忍言者而非賊在外之謂也次年書夫人姜氏孫于齊則討賊之義可知矣

傳十八年春公將有行遂與姜氏如齊申繻

曰女有家男有室無相瀆也謂之有禮易此

必敗公會齊侯于灤

盧篤切又音洛

遂及文姜如齊

齊侯通焉公譎之以告

灤水在今歷城西北入小清河夫人以公譎之告齊侯

夏四月丙子享公使公子彭生乘公公薨于

車魯人告于齊曰寡君畏君之威不敢寧居

來脩舊好

去聲

禮成而不反無所歸咎惡於諸

侯請以彭生除之齊人殺彭生

彭生乘公拉公脇遂薨魯言無所歸咎則有恥辱之惡於諸侯

秋齊侯師于首止子亶會之高渠彌相去七

月戊戌齊人殺子亶而轅音患高渠彌祭仲逆

鄭子于陳而立之是行也祭仲知之故稱疾

不往人曰祭仲以知去聲免仲曰信也

首止衛地今睢州東南轅車裂也鄭子莊公弟子儀仲曰信也者言知子亶不終渠

彌為戮齊人來討故不會齊師乃已本意

周公欲弑莊王而立王子克辛伯告王遂與

王殺周公黑肩王子克奔燕初子儀有寵於

桓王桓王屬音燭諸周公辛伯諫曰竝后匹嫡

兩政耦國亂之本也周公弗從故及

莊王桓王太子克莊王弟子儀辛伯周大夫妾如后庶如嫡臣擅命都如國皆亂本

當慎之

欽定春秋左傳讀本卷二




武英殿本重刊

左傳言本卷二

三

左傳言本卷二



御